



## **Aningaasaqarnermut Naalakkersuisoq**

### **TUAVIORTOQ**

#### **Aningaasaqarnermut Ataatsimiititaliap suliaq nr. 01.31.06/10-00478 pillugu pingasunngornermi ulloq 16. juni 2010-mi aalajangiineranik Naalakkersuisunut ilisimatitsineq.**

#### **Pinngortitaleriffimmut umiarsuarmut nutaamut aningaasaliissutit ilaneqarnissaannik qinnuteqaat**

##### **Naalakkersuisut inassutigaat,**

- kontomi pingaarnermi 87.75.01-imi, Pinngortitaleriffimmut umiarsuarmut nutaamut tunngasumi, suliassamut nr. 060.61.001-imut, Pinngortitaleriffimmut umiarsuarmut nutaamut tunngasumut, aningaasaliissutit 13,0 mio. koruuninik amerlineqassasut
- kontomi pingaarnermi 83.30.13-imi, Nuna tamakkerlugu paaqqinniffnnut tunngasumi, suliassamut nr. 996.40.032-imut, Uummannami iluarsagassanut annikitsunut kiisalu illumik pisinermut tunngasumut, aningaasaliissutit 0,275 mio. koruuninik ikilineqassasut
- kontomi pingaarnermi 84.40.12-mi, Ilinniartitaanermut sanaartukkanut tunngasumi, suliassamut nr. 060.52.027-imut, GU-imik alliliinermut tunngasumut, aningaasaliissutit 0,1 mio. koruuninik ikilineqassasut
- kontomi pingaarnermi 86.60.01-mi, Peqqinnissaqarfimmut tunngasumi, aningaasaliissutit 1,282 mio. koruuninik ikilineqassasut, taakkulu ima agguataarneqassasut; suliassamut nr. 018.49.012-mut, Alluitsup Paani nunaqarfimmi nakorsiartarfimmut tunngasumut, 0,045 mio. koruunit, suliassamut nr. 020.47.021-imut, Qaqortup napparsimaviani iluarsaassinerup, imm. 2-anut tunngasumut, 0,460 mio. koruunit, suliassamut nr. 060.46.008-mut, DIN-mi napparsimasunut uninngasarfinnut tunngasumut, 0,089 mio. koruunit, suliassamut nr. 060.47.030-mut, DIN-imi pilaasarfiup allilerneqarneranut tunngasumut, 0,507 mio. koruunit, suliassamut nr. 092.49.015-imut, Niaqornaarsummi nunaqarfimmi nakorsiartarfimmut tunngasumut, 0,104 mio. koruunit, suliassamut nr. 186.49.016-imut, Kuummiuni nunaqarfimmi nakorsiartarfimmut tunngasumut, 0,077 mio. koruunit
- kontomi pingaarnermi 87.72.13-imi, Immikkut ittumik iluarsartuussinermut tunngasumi, aningaasaliissutit 5,175 mio. koruuninik ikilineqassasut, taakkulu ima agguataarneqassasut; suliassamut nr. 080.97.604-imut, Sisimiuni B-790-p & B-791-p iluarsaanneqarnerannut tunngasumut, 1,78 mio. koruunit, suliassamut nr. 120.97.606 -imut, Ilulissani B-600-p aamma B-701-p iluarsaanneqarnerinut tunngasumut, 0,254 mio. koruunit, suliassamut nr. 996.97.115-imut, Iluarsaassinermik suliassanut annikitsunut assigiinngitsunut

tunngasumut, 2,339 mio. koruunit, suliassamut nr. 996.97.147-mut, Iluarsartuussinernut sumiiffinni assigiinngitsunut tunngasumut, 2006 0,802 mio. koruunit

- kontomi pingaarnermi 87.72.22-mi, Nunaqarfinni isorliunerusunilu inissialiortiternermut pilersaarummut tunngasumi, suliassamut nr. 998.35.016-mut, Nunaqarfinni isorliunerusunilu inissialiortiternermut pilersaarummut tunngasumi, 2007-imi aningaasaliissutit 6,168 mio. koruuninik ikilineqassasut.

### **Aningaasaqarnermut Ataatsimiititaliap oqaaseqaatai**

Pinngortitaleriffiup umiarsuartaassaanut 13 mio. kr.-inik ilassutitut aningaasaliissuteqarnissaq Naalakkersuisut suliame matumani qinnutigaat. Taamaalluni umiarsuaq katillugit 53 mio. kr.-inik akeqassaaq.

Taamatut akisunerulerneranut aningaasat matussutissat Sanaartugassanut Iluarsagassanullu Aningaasaateqarfimmi sanaartukkanit naammassineqareersunit nuussinikkut Naalakkersuisut pissarsiaarat. Tamatuma kinguneraa 2010-mi IST-p inerneranut missingersuutit qinnuteqaammit sunnerneqassanngitsut imaluunniit aningaasanut inatsimmi sillimmatinut kontot killiffii allanngortinneqassanngitsut.

Suliassap akitsorneranut aningaasalersuutissanut siunnersuummik Naalakkersuisut saqqummiussinerat Aningaasaqarnermut Ataatsimiititaliamit ataatsimut isigalugu pitsaasutut isigineqarpoq. Taamaakkaluortoq Sanaartugassanut Iluarsagassanullu Aningaasaateqarfimmi sulianik naammassineqareersunik misissuinikkut 13 mio. kr.-itut amerlatigisunik nassaartoqarsinnaanera ataatsimiititaliamit assut eqqumiigineqarpoq. Sanaartugassanut Iluarsagassanullu Aningaasaateqarfimmi aningaasat qanoq amerlatigisut sanaartugassanut *ilumut* attuumassuteqavinersut pillugu ataatsimiititaliap isumaliutiginninnissaanut tamanna pissutissaqalersitsivoq. Sanaartugassanut piviusorsiuunngitsunik missingersuusiorneq suliassanilluunniit naammassinninniarnep kigaannera pissutigalugit nunatta karsiata aningaasaatai annertuut ukiumoortumik aningaasanut inatsimmi pingaarnersiunerimi ilanngunneqartanngippata tamanna naapertuuttuunngilaq Missingersuusiornermullu inatsimmi Sanaartugassanut Iluarsagassanullu Aningaasaateqarfik pillugu siunertarineqartunik unioqutitsinerulluni.

Tassunga atatillugu Sanaartugassanut Iluarsagassanullu Aningaasaateqarfimmi sanaartugassanut aningaasaliissutit atorneqarnerat pillugu **piviusorsioortumik** missingersuusiortarnissaq ataatsimiititaliamit ukiorpassuarni **kaammattuutigineqartarmat** Aningaasaqarnermut Ataatsimiititaliap eqqaasitsissutiginnitsoorusunngilaa.

Tamanna tunngavigalugu aningaasanik allanik pisariaqanngitsunik pituttorneqarsimasunik atugassanngortitsisoqarsinnaanersoq pillugu naliliinissaq siunertaralugu aningaasaateqarfimmi suliassat misissorneqartariaqartut Aningaasaqarnermut Ataatsimiititaliaq isumaqarpoq. Sanaartugassanut Iluarsagassanullu Aningaasaateqarfik pillugu inatsisitigut pisussaaffigalugu ukiumoortumik nassuiaasiornermut atatillugu tamanna pisinnaavoq. Nassuiaat Inatsisartut 2010-mi upernaakkut ataatsimiinneranni suliarineqartussatut naatsorsuutigineqaraluarpoq, pissutsilli ilisimaneqanngitsut pissutigalugit Inatsisartunut suli tunniunneqarnani.

(1) Sanaartugassanut Iluarsagassanullu Aningaasaateqarfimmi suliassanik taamatut misissuinerup ingerlaannartumik aallartinneqarsinnaanera uppersaqqullugu Naalakkersuisut qinnuigineqarput.

(2) Sanaartugassanut Iluarsagassanullu Aningaasaateqarfik pillugu nassuiaat qaqugu Inatsisartunut tunniunneqassanersoq paasissutissiissutigineqassasoq kissaatigineqarpoq.

Amutsivimmi suliat akiisa maanna qaffakkiartornerat pissutigalugu suliame pilertortumik aalajangiisoqarnissaa pisariaqartutut isigineqartoq qinnuteqaammi allassimavoq. Nunarsuarmi aningaasakilliorneq pissutigalugu akit appasinnissaat naatsorsuutigeqqaarneqaralarpoq. Suliame isummernissamut tunngavissiaaqqartumi 2009-mi oktoberimi Aningaasaqarnermut Ataatsimiititaliamit sularineqartumi tamanna allassimavoq, tassani makku oqaatigineqarlutik:

*”Tamatuma peqatigisaanik nunarsuarmi aningaasakilliorneq pissutigalugu sanaartugassap siuartinneqarnissaanut pissutissaqarluarsimavoq, taamatullu Pinnngortitaleriffiup umiarsuarnut teknikkimut siunnersortaasa inassuteqarnerisa kingunerisaanik sivikinnerusumi, tassalu qaammatini 15-iinnarni sananeqassalluni.”*

Nunarsuarmi aningaasakilliornerup umiarsuarnik sanaartornerup akiinut sunniuteqarnera akit *appariartornissaannik* naatsorsuutiginninneq pissutigalugu sanaartornerup siuartinneqarnissaanut tunngavilersuutigierarlugu akit *qaffakkiartornissaannik* naatsorsuutiginninneq pissutigalugu ilassutitut pilertortumik aningaasaliissuteqarnissamut aamma tunngavilersuutigineqarmat Aningaasaqarnermut Ataatsimiititaliamit assut eqqumiigineqarpoq.

(3) Naalakkersuisut tamatumunnga qanoq oqaasissaqarpat?

(4) Ajornartorsiut tamanna pillugu umiarsuarnut teknikimut siunnersorti Naalakkersuisunit oqaloqatigineqarsimava?

(5) Sanaartornermut akit qaffakkiartortutut oqaatigineqartut sanaartornermi suliassanut aallartinneqareersunut piaartumilluunniit aallartinneqartussatut naatsorsuutigineqartunut aamma sunniuteqarsinnaappat?

Taama oqaaseqarluni aningaasaliissuteqarnissamik qinnuteqaat Aningaasaqarnermut Ataatsimiititaliamit akuerineqarsinnaavoq.

### **Aningaasaqarnermut Ataatsimiititaliap aalajangiinera**

Naalakkersuisunit inassuteqaatit Aningaasaqarnermut Ataatsimiititaliamit **akuerineqarput**. Tamatuma peqatigisaanik apeqqutitut siuliani allassimasunut akissuteqaammik tigusaqarnissani ataatsimiititaliap qinnutigissavaa. Kalaallisut danskisullu akissuteqaat ima siusitsigisukkut nassiunneqassaaq Aningaasaqarnermut Ataatsimiititaliap ulloq 30. juni 2010-mi tullianik ataatsimiinnissaani sularineqarsinnaassalluni. Qarasaasiakku nuutinnera uunga nassiunneqassaaq: [nch@ina.gl](mailto:nch@ina.gl).

Aningaasaqarnermut Ataatsimiititaliap sinnerlugu

Naaja Nathanielsen  
Aningaasaqarnermut Ataatsimiititaliami siulittaasoq